

Uunga siunnersuut: Nunaoil A/S pillugu Inatsisartut inatsisaata**atorunnaarsinnejnarnera pillugu Inatsisartut inatsisaat***Aatsitassanut Inatsisillu Atuutsinnejnarnerannut Naalakkersuisumit saqqummiunneqartoq***pillugu****Aningaasaqarnermut Akileraartarnermullu Ataatsimiititaliap****siunnersuutip aappassaaneerneqarneranut****ISUMALIUTISSIISUTAA**

Ataatsimiititaliap suliarinninnermini ilaasortarai:

Inatsisartunut ilaasortaq Hans Peter Poulsen, Siumut, siulittaasoq

Inatsisartunut ilaasortaq Jens Frederik Nielsen, Demokraatit, siulittaasup tullia

Inatsisartunut ilaasortaq Asii Chemnitz Narup, Inuit Ataqatigiit

Inatsisartunut ilaasortaq Mariia Simonsen, Inuit Ataqatigiit

Inatsisartunut ilaasortaq Kuno Fencker, Siumut

Inatsisartunut ilaasortaq Lars Poulsen, Siumut

Inatsisartunut ilaasortaq Jens Napaattooq, Naleraq

UKA 2022-mi ulloq 29. september 2022 siullermeerinninnerup kingorna ataatsimiititaliap sunnersuut misissorpaa.

1. Siunnersuutip imarisaa siunertaalu

Siunnersuut Nunaoil A/S pillugu Inatsisartut inatsisaata nr. 15, 7. december 2009-meersup atorunnaarsinnejnarnera tunngavoq. Nunaoil A/S pillugu Inatsisartut inatsiaanni § 1 naapertorlugu ikummatisanut akuersissutini Namminersorlutik Oqartussat peqataanerisa kiisalu Kalaallit Nunaanni Kalaallillu Nunaata avataani suliassat tamatumunnga atatillugu pissusissamisoortutut inisisimasut isumaginissaat Nunaoil A/S-ip siunertarigaa siunnersuuteqartup paasissutissiissutigaa. Siunnersuuteqartup nangilluni paasissutissiissutigaa Naalakkersuisut ulloq 24. juni 2021-mi aalajangertut ikummatisanut akuersissutinik tunineqarnissamik qinnuteqaateqaqqusisarneq aammalu Kalaallit Nunaanni tamarmi ikummatisanik misissuissamut qalluinissamullu akuersissutinik nalunaaruteqartarneq unitsinnejartoq. Kiisalu siunnersuuteqartumit paasissutissiissutigineqarpoq Nunaoil A/S pillugu Inatsisartut inatsisaata atorunnaarsinnejnarneratigut ingerlatseqatigiiffiup malittarisassaani siunertamut aalajangersakkap allannngortinnissaanut periarfissaqalissasoq, taamaalilluni ingerlatseqatigiiffik ingerlatani

allani ikummatissanut akuersissutinut toqqaannartumik atassuteqanngitsuni suleqataasin-naalissasoq.

2. Siunnersuutip Inatsisartunit siullermeerneqarnera

Siullermeerinninnermi siunnersuut amerlanerussuteqartunit taperserneqarpoq. Tamatuma saniatigut ingerlatseqatigiiffiup ingerlaqqittut siunissami siunertarisassaa aningaasaqarnikkullu pissutsit atugassai inersuarmi oqallinnermi annertuumik qitiutinneqarput.

3. Tusarniaanermut akissutit

Tusarniaanermut akissutit inatsisisstatut siunnersuummut ilangunneqarsimapput, tamannalu Inatsisartut Siulittaasoqarfiata ilusiliinissamut piumasaqaataanut naapertuuppoq.

Siunnersuummilli tusarniaanermut piffissaritinneqartup sivikinnera upuarneqassaaq. Siunnersuummut nalinginnaasumi nassuiaatini allassimavoq siunnersuut piffissami 5.-26. juli tusarniaassutigineqarsimasoq, tassa sapaatit akunnerini pingasuni (ulluni suliffinni 15-ini). Pingaarnertut malittarisassatut sapaatit akunnerini sisamani tusarniaanissamut piffissa-qartitsinissaq malinneqartariaqarpoq.

4. Ataatsimiititaliap siunnersuummik suliarinninnera

Amerlanerussuteqartut siunnersuummut tapersiinerat ataatsimiititaliamit maluginiarneqarpoq. Aammalu siunnersuutip matuma akuersissutigineqarneratigut ingerlatseqatigiiffimmut maanna siunertaasoq atorunnaassasoq ataatsimiititaliamit maluginiarneqarpoq. Tamanna ingerlatseqatigiiffiup ingerlaqqittup siunissaanut tunngasumik apeqquitinut tunnganerusumik sivisumik oqallinnermut tunngavissiivoq.

Oqallinneq apeqquitinut makkununnga ilaatigut tunngavoq:

- Ingerlatseqatigiiffimmut ingerlaqqittumut aningaasaqarnikkut allaffissornikkullu kingunerisassat, siunissami ingerlatanut tunngaviusussat.
- Ingerlatseqatigiiffiup ingerlaqqittup aaqqissuussaanikkut ingerlatsinikkullu kiisalu niuerikkut angaasalersugaanikkullu periarfissaanut Naalakkersuisut qanoq naatsorsuute-qarnersut.
- Siunissami ingerlatassat aningaasaqarnikkut illorsorneqarsinnaasumik ingerlatseqati-giiffimmit ingerlaqqittumit isumagineqarsinnaanissaat Naalakkersuisunit, Namminersorlutik Oqartussat aktiaatilitut soqtigisaannik isumaginnittutut, qanoq qulakkeerne-qarsinnaanersut.
- Ingerlatseqatigiiffiup siunertaanik atorunnaarsitsinerup nassatarisaanik ingerlatseqati-giiffiup matunissaa naapertuunnerpaajunnginnersoq.

Ingerlatseqatigiiffiup ingerlaqqittup siunissaa inaarutaasumik paasinarsisinneqartussanngorpat qulequttat taakku tunngaviulluinnartut oqallisigineqartariaqarlutillu inissinneqartariaqartut ataatsimiititaliaq isumaqarpoq. Apeqqutit taakku siunnersuummi matumani qitiusumik qulequtarineqartup aalajangiiffigineqarnissaanut tunngatillugu aalajangiisuunngitsutut ataatsimiititaliamit isigineqarput. Ingerlatseqatigiiffiup ingerlatanik sunik ingerlatsisinnaanerata Naalakkersuisunit, Namminersorlutik Oqartussat aktiaatilitut soqtigisaannik ingerlatsisutut, taamanikkussamut erseqqinnerusumik qulaanarneqareerpat apeqqut taakku ataatsimiititaliap isumaa malillugu qaqinngitsoorneqarsinnaanggillat. Tassunga atatillugu Inatsisartut Inatsisartullu ataatsimiititaliaat susassaqartup sulinermi tassani akuutinneqarnissaat ataatsimiititaliamit naatsorsuutigineqarpoq.

Ingerlatseqatigiiffiup siunissaanut akisussaaffik Naalakkersuisut Siulittaasuata ataaniissasoq suliassaqarfimmut Naalakkersuisusup naggasiutigaa. Tamanna ataatsimiititaliamit paasinittumik pissuseqarfingineqarpoq. Tamatumalu peqtigisaanik ataatsimiititaliap paasinninnea malillugu ineriartorneq pinngortitamut mianerinninnerusoq imminullu napatissinnaasoq siunissami salliutinnejassasoq siunnersummik siullermeerinninnermi nalinginnaasumik isumaqatigiissutigineqarpoq.

5. Siunnersuutip aningaasaqarnikkut kingunerisassai

Siunnersuutip akuersissutigineqarnerani aningaasatigut kingunerisassai nalinginnaasumik nassuaatit ataani nalunaarneqarsimapput. Tunngavissatut pigineqartut tunngavigalugit allamik naliliinissamut ataatsimiititaliaq tunngavissaqanngilaq.

6. Ataatsimiititaliap inassuteqaatai

Ataatsimiititaliami amerlanerussuteqartut Inuit Ataqatigiinneersut, Siumumeersullu siunnersuut akuerineqassasoq inassutigaat.

Ataatsimiititaliami ikinnerussuteqartut Naleqqameersup Demokraatineersullu siunnersuut itigartinneqassasoq inassutigaat.


Inassuteqaammut tunngatillugu Demokraatit ikinnerussuteqarlutik ima oqaaseqaateqarput:

"Demokraatit akuerisinnaanngilaat appeqqutit pingaarutilik akineqanngittut, siunnersuullu taamaattumik itigartillugu. Inatsit allanngortinneratigut Nunaoil A/S allamik siunertalerlugu ingerlatinniarneqalerpoq taamaattorli sunarpiaq pineqarnersoq naammangittumik akineqarluni. Isumaliuutissiissummi imm. 4 ataani apeqqutit naammattumik akineqartinnatik una siunnersuut akuerineqarsinnaanngilaq, tamanna kukkunerussaaq."

Inassuteqaammut tunngatillugu Naleraq ima ikinnerussuteqarluni oqaaseqaateqarpoq:

"Selskabeq ooriuteqangaatsiartoq millionerpassuarnik ooritaqartoq siunertaaruteriarlugu, ersarinnerusumik siunertalernagu Naalakkersuisooqatigiit siunnerfeqarnerat Naleqqamiit toqqisisimanartingilarput. Suliffeqarfutigut aningaasameertut Naalakkersuisut aningaasmaertut, aningaasarpassuit illukartinniarneqarnerat qanoq atorneqassanersut oqaatigina-veersaarlugu iliuseqarneq apeqqusernartoqartipparput. Taamatut Naleqqamiit akuer-saannginnitsinnut toqqammavigaarpot selskabinut pallittaalisalorsorluni ingerlatseriaatsimik ingerlatseqqiineq ammasumik periuseqarluni sulinerunngimmat akerlaraarput. Naleqqamiit isumaqaratta suliffeqarfik siunertaa peerneqarpat aningaasarpassuit landkarsimut nakkartittartariaqartut Naleqqamiit isumaqaratta."

Taama oqaaseqarluni isumaliutissiissummilu allassimasutut paasinnilluni ataatsimiitaliap siunnersuut aappassaaniigassanngortippaa.



Hans Peter Poulsen
Siulittaasoq



Jens Frederik Nielsen
Siulittaasup tullia



Asii Chemnitz Narup



Kuno Fencker



Mariia Simonsen



Lars Poulsen

Jens Napaattooq